

26. maj 2014

UPA 2014/44
Jens Immanuelson

Akilerarusersuinikkut iliuitsit aqqutigalugit Nunatsinni inuit aningaasatigut pissakinnerusut atugaasa, tamatumani anaanaasut ataataasullu kisimiittut arlariinnik meraqartitertut oqilisaassiffigineqarsinnaanerit pillugu apeqquteqaat aallaavigalugu oqallisissiaq.

(Inatsisartunut ilaasortaq Aqqaluaq B. Egede, Inuit Ataqtigiit)

Siumup anguniartuarpa ilaqtariit meerartallit toqqissisimasumik inuuneqarnissamut toqqissisimanartumik angerlarsimaffeqassasut angajoqqaat meerartallit ersarissumik pisinnaatitaafiisa ersarissartuarneqarnissaat.

Taamaattumillu Inatsisartuni ilaasortaq Aqqaluaq B. Egede-p oqallisissiaa tikilluaqqunarpoq naak aalajangiiffigisassatut siunnersuutaanngikkaluarluni siunissami qanoq aqqissuussisoqarsinnaanerit qulaajaanissamut aqqutissiuusseqataasussaamat meeqqanik pilersuineq eqqarsaatigalugu.

Ilaqtariit inuiaqatigiinni qitiupput meeqqanut toqqissisimanartumik angajoqqaatut oqartussaassusillit angajoqqaallu pilersuisussaataasut inatsisitigut periarfissaqartinneqarpata tamanna aamma toqqisiisimanartumik meeqqat peroriartornissaanut sunniteqassamat.

Takorloorsinnaavarput angajoqqaat kisimiittut meeqqanut pilersuisussaataanermi naammassinniarsarinermini qanoq ilungersunartorsiorsinnaasarnat ineqarnermut akiliutitigut, meeqperivinnut akiliutitigut anigaasartuutillu allat pilersuisussaataanermi naammassiniarneqartussat eqqarsaatigalugit.

Taamaattumik Siumut isumaqarpoq aqqissuuseqqinerit isumaginninnikkut akileraartarinnikkut aqqissuussivigineqarneranni pissakinnerusunik taaneqartartunut aamma minnerungitsumik meeqqanik pilersuisussaataasunut aqqiissutaasinnaasut ullumernit pitsaernerusariaqartut, soorlu makkunatigut:

- Ineqarnermut akiliutissat meerartarisat amerlassusaat naapertorlugu ilanngaaser-sorneqartalernerisigut.
- Meeqqanut paaqqinniffinnut soorlu meeqperivinnut akiliutaasartut qaffasinnerpaaffilernerisigut.

Ilaqutariit siunnersoneqarnikkut ikorfartornerisigut soorunami tamanna pisariaqartinneqarpat, taamatut aaqqissuseqqinneq isumaginninnermi aaqqissuusseqqinnissamik pisariaqartitsiviuvog taamaattumillu isumaginninnikkut ilaqutaariit meerartallit pisariaqartitsinermut naapertuuttumik aaqqissuussivigineqarnissaat Siumup suleqataafigissagaa naatsorsuutigineqassaaq.

Inuiaqatigiinni anguniarneqarpoq atugarissaarneq tamanna assortuussutissaanngilaq aamma angajoqqaat kisimiittut arlalinnillu meerartallit atugaat pitsangorsassagutsigit aningaasatigut pisinnaasatta annertusarnissaanut suleqatigiinnerusariaqarpugut eqqarsaqatigiinnerullutalu siunissamimi inuiaqatigiinni pisariaqartitatta aningaasatigut annertuumik unammilligassaanerat ilisimavarput, taamaattumik anigaasarsiornikkut suleqatigiinnerullutalu eqqarsaqatigiinnerunissarput maannamiit suleqatigiiffiginerusariaqaripput Siumut isumaqarpoq.

Oqallisissiamik saqqummiussaqaartup qulequtsiussaani akileraarusersuinikkut iliuitsit aqutigalugit aaqqissuussisoqarnissaanik apeqquteqaat aallaavigalugu oqallisissiaq ilanngulluni Naalakkersuisut akileraartarnerup isumaginninnikkullu aaqqissuusseqqinnermi ilanngullugu nalilersuiffigineqarnissaanut isumaliutinut ilaatinneqarnissaa Siumup kaamatututigaa.

Inatsitigut sinaakkutit aaqqissuussivigineqarneranni pingaaruteqarpoq kommuunit susasaqartullu tamarmik isummersueqataallutillu isertitakitsunut minnerunngitsumik angajoqqaatut meeqqanut kisimiillutik pilersuisussaataasut eqqarsaatigalugit naapertuuttumik pilersuisussaataanerani oqilisaanissamik anguniagaqarnermut suleqataatinneqarnissaat.

Siumumi apeqquteqaat aallaavigalugu oqallisissiaq soqutiginarpoq taamatut oqaaseqarfigaarput oqallinnissamilu saqqummiussaqaartoq qutsavigaarput saqqummiussamut pingaaruteqartumut saqqummiussaqaarneranik.